



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно

В Америкі 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл.,
 $\frac{1}{8}$ стор. 20 зл., $\frac{1}{16}$ стор. 10 зл.:
оголошення малы за 1 мм. 20 гр.
в тексті 30 гр., перед текстом
40 гр. При місячному и долгом
оголошеню значна знижка.

Ковто чекове Нр. 404 155.

Ціль гостини гр. Чияно в Будапешті.

До Будапешта выїхал італіянський міністер заграничних справ гр. Чияно. Поїздки той приписують газети велику вагу. Венгрия не переставе домагати ся опертя своих границ о верхи Карпат и числит ту на поперть со стороны нашей Державы.

Газеты італіянскы пишут, же Италия отнесе ся до жадань венгерскых прихильно, а кромі того намекають, же их міністер загра-

ничных справ обговорит справу господарчих отношень меже Италиом и Венгриом а также справу дальшого останя Венгрии при Лигі Народов.

Гр. Чияно в часі венгерской гостини принял участь в польованю, яке уряджено в его честь и на котром были присутны всі державны достойники венгерскы.

Англия вооружат ся.

Одночасно с усилиями, які поднимат премьер Чемберлен в цілі удержання в Европі мира, не занедбує Англия и о оружных своих силах и вскріпят ся, особливо на морі. В самом 1939 році маюť в Англії выбудовати 45 военных пароходов о загальной тонажи 355.705 тон.

Кораблі тоты будут розвивати скорость 30 морских миль на годину и будут вооружены в арматы найтяжшого калибру.

В дальших плянах Англії ест будова дальших пароходов и самолетов.

Также и Франция не остає со заду и перезначат на 1939 рок на будову кораблей суму 8 миллиардов франков. За тоту суму маюť выбудовати 130 новых пароходов о загальной тонажи 340.000 тон.

Великы маневры в Америкі

В р. 1939 в Америкі маюť ся odbyти великы войсковы маневры под знаком обороны перед нападом со стороны держав европейскых.

Войско поділит ся на дві часты: чорна ескадра буде нападати, біла ескадра буде боронити берегов Америкы.

В маневрах, котры зачинають ся уж в січні 1939 р. и обнимут ціле побережье Атлантичного Океана на долготі Злученых Стейтов, прийме участь 140 кораблей и 600 самолетов.

До того часу Америка уряджала маневры на Океані Спокойном, бо виділа опасность с той стороны, а тепер видно, штоси ся зміжило.

На весну 1939 р. выборы до сейма Прикарпатской Руси.

С Праги доносят: Закон о автономии Прикарпатской Руси, оголошений в Дн. Законов, постановляють, же выборы маюť быти переведены в 5-ох місяцах от часу оголошения закона. Понеже закон тот оголошено дня 19 грудня, выборы в виду того мусли бы быти переведены в часі до 19 мая 1939 р.

В кругах политычных сподівають ся, же выборы тоты будут переведены уж в марті. Закон о автономии Прикарпатской Руси ест такый самый, як о автономии Словакии. Право голосу будут мати тоты, котры в день выборов будут мати полных 21 літ.

На каждых 20.000 населеня даной группы ест признанный оден мандат. Закон не бесідує о числі мандатов, але на основі числа населеня можна обчислити, же сейм Прикарпатской Руси буде числити 27 послов.

Поменьшане через арбитражный суд во Відні число населеня Прикарпатской Руси выносит тепер 544.759, в том числі 413.481 русинов, 17.495 чехов и словаков, 8.715 німцов, 25.894 мадяров, 65.828 жидов и 13.268 инших национальностей.

На стороні третей и четвертой ныншнього числа поміщаме переказ розрахунковый. Переказ тот просиме вырзати и посредством него переслати пренумерату за газету „Лемко“.

Просиме всіх выровнати свои рахунки за газету „Лемко“ и календары.

Ворожбы на 1939 рок.

Як каждого року, так и тепер появляють ся уж в газетах ворожбы на 1939 рок. Чи и в якой части ся они сполнят покаже недалека будущность.

Ворожбы такы подає меже иншими „про-роками“ также Оссовецкий, котрый повідат, же рок 1939 буде роком дальших неспокоев политычных, особенно серед держав центральной Европы. В Польці однак має быти найспокойніше.

Німеччина буде переживати сильный внутренний фермент, а в половині року высуне знова справу кольонии. В державах прибалтийских лад и мир и добры сусідскы отноше-ния с Польщом.

Франция и Италия будут приготавливати ся до войны меже собом. До войны не допустит однак Англия, котра дальше буде старати ся удержати за всяку ціну спокой и мир.

В Румунии дойде до чогоси, подобного до революции. В Австрии невдоволенє с Німеччины и сильный фермент.

Вооруженя, вооруженя во всіх державах. Всі будут жити под страхом войны и вооружати ся от ног по голову.

В Злученых Стейтах Рузвелт загроженный и фермент.

В Росии падає комунизм. Бунты селян, диктатура войска, Сталин отходит.

Німеччина буде старати ся достати до Росии на Украину через Румунию. Справа Украины стане ся справом цілой Европы. Для Польци настанут тяжкы часы, але ціла справа закончит ся счастливо.

Рок 1939 буде тяжкый также для жидов, значно тяжший, як 1938. Але тото несчастье уратує их народ. Колиси будут они вдячны Гитлерови, бо через него они организують ся ище сильніше. В р. 1939 повстане початок жидовской державы, котра утворит ся в Росии, в области Дона.

Двох пануючих отойде. Оден закончит трагическом смертю.

В Польці розрост промысла и поднесене господарче краю.

Чи замовили Вы уж
КАЛЕНДАР „ЛЕМКА“ на 1939 рок?

Давайме дітям тран.

Штобы человек мог робити, мусит ся отвітно кормити. Не давно ище, бо перед 30-роками люде думали, же до нормального розвитку сил выстарчит, штобы организм человека доставал основны кормовы складники т. е. білко, толц (омасту) и цукор.

Погодивше показало ся, же воду и минеральны соли мусиме также зачислити до основных кормовых складников. Дальши спостереження и досліды выказали, же кром: выже вычисленых складников в кормі человека мусят находити ся гдеякы користны чинники, котрых присутствие в организмѣ ест конечно потребне для жита и здоровья, а котрых брак выкликуе в организмѣ человека опасны недугы загальны, або місцевы.

Тоты додатковы чинники названо витаминами. Витамины сут то тіла хемичны, незвычайно зложены, котрых организм сам собі вытворити не потрафит. Их присутствие в организмѣ человека взрослого ест конечно потребне для здоровья, а необходимо для розросту и розвитку дитины. Без отвітной скилькости витамин жадна дитина не буде на правду здорова.

Витамины находят ся переважно в овочах и яринах, а гдеякы с них находят ся в омасті, переважно в свіжом маслі, яйци и трані.

С посеред всіх витамин, якы даеє дітям, найбільше интересуют нас тоты витаминны, котры противділают англицкой хвороті у дітей. Уж от давно спостережено, же на англицку хвороту западают найчастіше діти, хованы штучно и рідко выношены на сонце. Діти такы, яко немовлята, мают мятку головку, поздно зачинают сидати и ходити, поздно достають зубкы, мают великы брюшкы и кривы, тонькы ножкы.

Штобы предохранити діти перед том хворотом, треба давати им тран, котрый має в собі дуже витамин противкривичных. Дітям до двух літ даеє по одной малой ложочці денно, дітям до 5-ох літ даеє по середной ложці, а старшим по полной ложці трану денно.

Діти, котры шют тран, мают здоровый вид, смак до їдла и не западают легко на рижны хвороты. Сут здоровы и веселы.

Если хочеме, штобы тран лучше діяствовал, мусиме стремити до того, штобы діти як найдоше находили ся на свіжом воздуху на дворі. Лем тран и свіжий воздух хоронят діти перед англицком хворотом; они дадут дітям здорове и радость жита.

Уж вышол с друку богато иллюстрований

КАЛЕНДАР „ЛЕМКА“

НА 1939 РОК.

Ціна одного календара разом с календарем стінным выносит 50 грошей.

При замовленю 5-ох штук даеє 20 процент оушту. — Календар тот повинен найти ся в каждой лемковской хаті. Читатель найде в нем интересны оповіданя и цілий ряд статей о веденю сельского господарства в горах. Ест он отже потребном книжком для каждого, кому лежит на сердци добро своей родины и дітей. Прото понагляйте ся с замовленем календара Лемка на 1939 рок!

Чи дали вы уж лепту на зимову помоч для безработных?!

Памятайте о зимовой помочи для безработных и их дітей!

Як очистити одеж с плям.

Пляма шпетит одеж больше от латы, бо пляма, то доказ недбалости и бруды, а лата свідчит о старанности и ошадности. Прото старайте ся все о того, штобы ваща одеж была чиста и без плям.

Ніт праві таких плям, котры не дали бы ся усунути. Треба лем робити того уміло. Часто выстарчат студена, або горяча вода, мыло, часом треба ужити средства острийши.

Плямы треба усувати зараз, як их спостережеме, бо они ницат тканину, а зрештом свіжу пляму скорше можна усунути. Поплямлену одеж треба передовсем вытрепати с пороку и вычистити щотком.

Найчастіше повстают плямы с омасты. Чистиме их горячом водом с мылом, а коли то не помагат, бензыном. Под поплямлене місце подкладаме чисту шматку, а пляму потеряме чистом рядном, мачаном в бензыні так долго, покаль пляма не счезне.

Плямы с зарджавленя: свіжи плямы чистит ся горячим соком цытрыны.

Плямы со смолы: місце заплямлене смаруе ся маслом, а погодивше натерат ся бензыном и терпентыном.

Плямы с травы: вытерат ся рядном намоченом в спиртї.

Плямы с кырви: намочити и выпрати в зимной воді с мылом.

Плямы с овочей: поплямлены места намочити горячом водом и потерати амоняком.

Плямы со свічки, або воску: найлучше ест прасовати горячим желізком через бибулу. Можна также такы плямы выкыршити и выскребтати, а рещту вычистити спиртом або бензыном.

Лев Толстой.

Откаль пришло на світ зло?

(Байка).

Оден пустельник жил в лісі и лісны звірята не бояли ся его цілковито. Пустельник бесідовал со звірятами, розуміл их и они его розуміли.

Раз положил ся пустельник под деревом. Крук, голуб, олень и гад собрали ся в том самом місци, штобы попрі человеку ноч провести. Звірята бесідовали меже собом и одно с них шмарило пытане:

— Окаль бере ся зло на світі?

— Крук сказал:

— Зло приходит на світ с голодом. Если ся ктоси добре наїст, сидат на галузи и краче. Всьо выдае ся ему веселе и добре, всьо его радуе. Але най ктоси с мусу попостит два дні, всьо выдае ся ему мерзке и он не хоче на Божий світ смотрити. Втотчас штоси его тягне, Бог віст, где он мітат с місца на місце, не можна найти хвилі отпочинку. А найже случайно увидит он мясо, тратит цілковито голову и мече ся на него безмысленно.

Хоц бы толкли кыями и каменями, хоц бы метали ся на них волкы и псы, нич уж втотчас не потрафит перешкодити. А якы-ж то громады здышут попросту от голоду. Так, так, всьо, што ест зло, приходит на світ от голоду.

Голуб сказал:

— А я думам, зло приходит не от голоду лем от любви. Если бы каждый жил для себе, было бы втотчас мало згрызоты. Голова одна не бідна, а хоц бідна, то одна. А мы жиєме все парами. Товаришку свою любиме звычайно так дуже, же хвилі спокою найти собі не можеме и думаєме о ней безпрерывно, а чи она не голодна, а чи ей не зимно? А коли случайно любовница твоя отлетит от тебе, ставш ся страшно несчастливый. Полну голову маєш обавы, штобы ю где ястряб не напал, або люде не хопили, літаш по всіх кутах, штобы ю отнайти и попадеш сам в несчастье, — або ястряб тя нападе, або инша біда ся приплянче.

А коли пропаде твоя подруга, жите перестав быти для тебе миле. Не іш, не пеш, глядаш лем ю цілий час. О! килько то голубов пропало

через любовь. Всьо, што ест зло, приходит на світ не от голоду, а с любви.

Гад сказал:

— Ні! Тото, што ест зло, не приходит от голоду, не приходит также с любви, але оно приходит с ненависти. Если бы жили в згоді и не ненавиділи ся взаимно, всьо выдавало бы ся нам миле. Але што-ж — як лем ся ти дашто не подабат, сейчас впадеш в гнів — и от того часу став ся тобі всьо немиле.

Думаеш лем все над тым, штобы на комси свой гнів выладовати. Забываш ся, сычиш и глядаш, кого бы укусити. Никого втотчас терпіти не можеш; аж и отца и матер можеш втотчас смертельно укусити. Самого себе ты бы втотчас задавил в своем гніві. И ненависть наполняет тебе так долго, покаль сам не доведеш себе до згубы. Всьо, што ест зло, бере свой початок с ненависти.

Олень сказал:

— Ні! не с ненависти, не с любви и не от голоду бере ся на світі зло, лем с боязни. Если бы не треба было ся бояти, всьо было бы добре. Ногы наши сут скоры, маме велику силу. Мале звірятко можна легко отгнати рогами, перед великим можна утечи. А преця все живе ся в страху. Вітер, ледво порушит галузь в лісі, листе ледво зашелестит, страх робит того, же трясеме ся на цілом тілі, сердце бе страшно, як если бы хотіло выскочити с грудей, мусит ся мимо волі втікати и то, килько сил старчит.

Другым разом заяц перебіжит, птах ся порушит, суха галузь впаде на землю, страхаш ся, мыслиш, же то враг страшный, втічеш знова и власне втотчас впадеш в лапы якомуей хищному звірови. Колиинде втічеш перед псом и впадеш на человека. Часом страхаш ся, сам не знаш чого и біжиш сам не знаш где и в скором бігу впадеш в пропасть и убиваш ся на місци. Коли ся спит, замыкаш лем одно око, бо треба все смотрити и слухати и не отступат тебе ани на минуту тот страшный страх. Нигде и николи не можна найти отпочинку. Всьо, што ест зло, походит от страха и боязни.

Втотчас сказал пустельник:

— Ани от голоду, ани с любви, ани с ненависти, ани также не от страху приходят всі наши згрызоты. Всьо, што ест зло, бере свой початок с нашего власного тіла. С него походят: голод, любовь, ненависть и боязнь.

Што чути в світі и в краю

Италия хоче получить ся тунельом со Швейцариом. Газоты италиянскы и швейцарскы доносят, же меже Италиом и Швейцариом маюť приступити до будовы автострады подземной. Автострада має переходити через тунель долгий на 6 кильометров. Через выбудоване такого тунеля скоротила бы ся значно дорога меже Турыном и Базыльом.

Операция на убочи горы. В Татрах сходил туриста по облєдїлїх уж скалах на долину, похользнул ся и упал в пронасть, не могучи ся порушити. Увидїл того дыректор шпиталя в Закопаном, котрый в том часї был также в горах и поспїшил ранному с помочом. Показало ся, же туриста має скручену ногу. Лікар перевел ему операцию на місци, при чом туриста был так перестрашенный, же правї цілковито не чул болю.

Костяна мотыка с перед 10 тысяч літ. В часї выкопов при регуляции рікы Вилии коло Турвишок выдобыто с дна рікы мотыку костяну, походячу с часов каменя гладженого, т. е. с перед 6 до 8 тысяч літ перед Рождеством Иисуса Христа. Мотыка ест зроблена с оленього рога и через так долгий час заховала ся добре.

Народ о найздоровших зубах. Краєм, где нїт правї совсем людей о нездоровых зубах ест Гренляндия. Лікар дунский др. Педерсен, котрый долгий час жил в Гренляндии, твердит, же тоты народы, до котрых не доходят товары кольонияльны, маюť значно здоровни зубы от тых, где ідят кольонияльны товары. В Гренляндии, в тых округах, где нїт кольонияльных товаров, западат на зубы лем 1.8 процент населєня, а в инших, до котрых тоты товары доходят, хворїе на зубы 29 процент.

Килько народов живе в Парижі. В столиці Франции живе 75 национальностей. Наибольше ест там италиянов (95.952), друге місце занимают полякы с числом 58.724, третє емигранты с Росии 32.915, дальше живе там 26.170 бельгов, 24.325 испанцов, 19.862 швайцаров, 14.863 німцов, 11.864 армян и много инших народов.

90-літний старец, засуджений на мусовы работы. В Совїтах засуджено 90-літного старца на 6 місяцов мусовых работ. Засуджений ест грузин Габриядзе за побите хлопа. Верховный суд грузинский республики затвер-

дил вырок. Родина старика внесла телеграфично просьбу до Сталина о подарованє кары.

В Румунии не буде деревец. Румунскы власти заказали уряджати в том роцї риздвяны деревка, бо має то быти звычай нерумунскый, а кромї того має того шкодити лісам.

С Німеччины выганяют цыганов. В Німеччині появило ся распорядженє, на основї котрого всі кочующи цыгане будут с границ Німеччины усунєны. Кромї того цыганов ділит ся на три группы, а имено: цыгане с чужих краев будут выселєны, „цыгане жидовскы“ будут поміщєны в концентрационных лягєрах и „цыгане арийскы“ достанут вызначєне місце, на котром мусят ся поселити на все.

В Палєстыні все неспокойно. Нїт дальше згоды меже жидами и арабами в Палєстыні. В послїдном часї Англия взяла ся остро до здьяленя беспорядков и в борбі с арабами послугє ся самолєтами.

Недавно в Бененаим коло Єрусалима пришло до боя меже арабскыма повстанцами и брытійскыма войсками.

В акции приняли участь по сторонї брытійской самолєты, котры обшарили бомбами повстанцов, крїючих ся серед скал. Бой трєвал близко 3 години. В борбі упало понад 60 арабов. По сторонї брытійской ест двох ранєных.

150.000 жидов мусят опустити Румунию. Румунскы власти навязали переговоры с жидовскыма организациями в справї зреализо-

ваня правительственных проектов, относячих ся до эмиграции жидов, живючих в Румунии от часу законченя войны. Иде ту о 150.000 жидов, котры мусят выїхати в 3-ох роках. Румунскы власти маюť дати до распорядимости организаций жидовских фонды, потребны емигрантам, а также покрїют их кошты подорожи.

На Буковині власти закрыли 766 корчм с продажом горїлки, находячих ся в жидовских руках.

„Екскайзер“ Вильгельм хворый. Находячий ся в Доорн екскайзер Німеччины Вильгельм чув ся в послїдном часї недобре. Недомагат на сердїце. Недавно выписано до Доорн славного амерыканского лікара, спєциалиста от сердцевых хворот — дра Гугенєра.

В Москві розметано летучкы против Сталинови. От долгого часу в Москві розмітуюť по улицах летучкы и наклеяют по домах плакаты, в котрых атакуют совїтску констытуцию, Сталина и єго дорадников-жидов.

Летучкы такы росшмарєно также по университетех московских. Г. П. У. в звязи с тым арештовало 2-ох работников: Гопнака и Тараканова. Арештованы мали ся признати, же належат до „Братства Руской Правды“, котрого одним с руководителей ест член московской самоуправы Розов.

В звязи с тым арештовано около 500 людей.

Комунальна Каса Ощадности Повїта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.

тел. 115-97, 131-73, 101-03.

О т д і л є н я : К Р Ы Н И Ц А, тел. 112.

В Е Л И Ч К А, тел. 6.

Всі поручєня входячи в область банковости.

ПОРУЧЄНЯ ДЕВИЗОВЫ
ПОРУЧЄНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЄТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.

Miejsce dla pisemnych wskazówek dotyczących tytułu wpłaty oraz okresu czasu, do którego wpłata się odnosi. Korespondencja, zawierająca treści inne, podlega opłacie przez nadawcę znaczka pocztowego w wysokości opłaty taryfowej.

Nr. Listy rozrachunkowej.....

wpisał.....

sprawdził.....

Nr. listy rozrachunkowej.....

dzień
nadania

(podpis sprawdzającego)

„Переказ вирізати и надати на почту разом з залєглом прєнумєратом за Лемка”.

Типография А. Гольдмана
во Львові ул. Сикстуска 19.